

CARLOMONTIVM.



CARLOMONTIVM, siue, Mons Caroli, angustum est Comitatus Namurcensis oppidulum, firmissimæ arcis instar, Marieburgo vicinum tribus miliaribus, Namurco septem, pulchrè admodum in monte collocatum, ad sinistram fluminis Mosæ ripam, quo in loco prius Giuerum, vicus non ignobilis, situs erat. Nomen accepit à Carolo V. Cæsare, qui volens hoc ditionis atque Imperij propugnaculum obijcere Marieburgo à Gallis tum occupato, id condidit. Anno Domini M. D. LV. Hoc namq; tractu solertia & præmonstratione quorundam, etiam à Rege Philippo arces & loca munita sunt excitata, quemadmodum & à Maria Regina Hungariæ, non procul ab eo fluuius, qui ad Vireium oppidum in Mosam fertur (quem ipsa nauigationi statuerat idoneum reddere retatione) de suo nomine, munitissimum oppidum conditum est, quòd hæc loca nullis propugnaculis munita, hostium incurfionibus semper paterent, vnde Martinus Rossellus Gallico stipendio Francisco Regi deuinctus, dum exercitum in Galliam alia via è Geldria per Brabantiam ducere non posset, hac fecit expeditionem: quam, quia collimitia hæc nullis arcibus adhuc essent firma, propter locorum asperitatem & horrorem, quibus satis tuta & defensa credebantur, nemo cum tentauit impedire. Atque hæc, in hisce locis tam multorum munitissimorum oppidorum recenti memoria excitatorum, causa præcipua fuit.

LANDRECIVM.



LANDRECII situs ad Sabim est, tribus ab vrbe Querceto miliaribus, sex à Valencenis, Exiguum id quidem Hannoniæ oppidum, sed firmissimū. Et quod fortiter Carolo V. Cæsari Anno M. D. XLIII. restiterit, Gallis ipsum occupantib. valde famosum. Id exinde Galliæ Rex Duci Arschotano, cuius erat ditionis, restituit, cū quidem insequente anno Crepinij pax conciliata esset. Sed ita post Cæsar cum Duce transiit, vt oppidum hoc in suum ius, ac dominium transcriberet, Duci eius nomine compensationem ex æquo & bono faceret.

A VENIAE.



VENIAE, vulgò Auesnes, situ occupant fluuiolum Gepram, Landrecio distat quatuor miliaribus, Melbodio totidem: Splendidum hoc & valde firmum Hannoniæ oppidum. Comitatus vt vocant, dignitate censetur. Id, cum nuper adhuc in dominio esset Arschotani Ducis, Hispaniarum Rex æqua ei compensatione facta, sibi vindicauit. Cū enim ad Gallici Regni limites pertineat, domini potentioris defensionem atque tutelam, necessariam habet.

BELLOMONTIVM.



BELLOMONTIVM, Indigenis, situs amœnitatisq; causa, Beaumont, Cima-co, & Binsio abest quatuor miliaribus, Montio septem, in pulcherrimo quodam monte, abs quo & nomen habet, in Hannonia situm. Paruum id certè oppidulum, sed amœnum & venustum, iuris nunc quidem & domini Ducis Arschotani, olim portio hæreditaria secundi filij Hannonum Comitum, ex quo & Comitatus dignitatem habet. In eo, tempore ab hinc aliquanto, ante has Belgicas calamitates, Dux Arschotanus vt plurimum agere consuevit.